

粵行紀事
滇黔土司婚禮記

效

粵行紀事

粵行紀事卷第一

常熟瞿昌文壽明甫著

順治二年乙酉

時江南僭稱弘光元年

四月初一日王父赴粵西

巡撫之任昌文方十七歲隨父母同弟昌武送別錢塘江文以應試先歸月杪至家卽聞

大清兵下江南督師史閣部揚州盡難之信人情洶洶星馳迎父母歸五月初十日南都不守數日閒

大清兵克鎮江常州蘇州尋破嘉湖杭諸郡邑中職方郎嚴君枋兵科時君敏集紳士練義勇謀保一壘文竊

料區區下邑不啻彈丸豈能以烏合素不知兵之衆漫
爲抗衡而又慮粵西遠在嶺表王父母年俱半百以上
膝下無人吾父躬操家柄勢不得不伏處柴桑爲孫者
容不作芒鞋省祖事乎城于七月十四日破是時文侍
父母竄居山阿刺促不敢聲嗣後病瘡累月兼之兵烽
塞途未能爲毅然遠遊計迨丙戌春遙聞浙東魯監國
舉義唐王亦卽位閩中至秋而天台不守魯藩航海入

閩

大清兵進臨僊霞關拔福州唐王走汀州未幾遇害而

福州之師取道漳潮進攻粵東江西南贛二郡同時告
陷督制楊公廷麟萬公元吉相繼殉難兩粵之勢日蹙
文是時省祖之志愈堅且亟而搜捕逆宦之令下矣初
邑令洪一緯知府陳服遠行查遠仕未歸者不過徵索
饋獻繼而巡撫土國寶巡按梁應龍兵道金一鳳糧道
徐逢時推官單父令更有轄屬與地方無涉者總漕吳
維華巡江王國楠自戊冬以後勾牌絡繹差承羅布先
世清白吏所遺僅供祭掃餽粥之田及圖書畫卷洗括
一空而覆巢之下猶得完卵者幸丙辰同榜南安洪公

承疇以大學士招撫江南堅爲保護邑令瞿公四達與
前蘇州府知府史公應選爲子女親其人亦多識見有
膽氣力爲擔持撓折當道文父子不就此離然楚囚相
對父母日夕焦勞且時念王父母睽隔天外寢食俱廢
稚子不能代憂又弗忍坐視唯蚤暮西粵一行勸王父
黃冠還故鄉願足矣戊子春三月陰與趙子秋屋名延年
策圖南行而又憂羊腸峻坂干戈日尋行旅孔艱曷克
早遂我芒屨省祖之念濡滯者久之迺披圖稽道里屈
指計程知江右徑而塞浙閩遠而通第囊橐蕭然子身

襪被又不能效吹簫乞食之舉庶幾海道一帆乘風萬里可瞬睫聞得之計定欲告之父母知父母必恤體弱憂少不更事而嚴止之舍經從權且不告而行行而後告爲便至親友奴隸絕不露風意中同行唯秋屋是賴秋屋以親老不能遽違色養不忍強之徘徊濡滯者又數日適十一月廿四日旌德劉子文華名又相來語酣具道粵行故請偕行劉慨然曰子之行天實佑之也相辱而大父之知久矣敢不成子志維相母年逾七十弗能以身許友無已送子過浙東開帆航海子南征相北返

尋祖奉母各遂厥志矣文額手曰天惠我友五年契闊
千里枉顧侯季一言慷慨悲壯爲人所難爲之事成入
所難成之志君之功小子幸也馭娑石下一拜文華遂
大笑出門去行之先一日別秋屋未與詳語歸館沐浴
祈夢兆得吉詰旦臘月朔黎明起拜天地辭家廟隨一
童子步出東郭塔院文華已操小舟候河下使童子他
之解纜遶行腰裏無絲絮止手攜十金爲先二日姑丈
陳子固所遺者以其半贈文華寄奉老母以半爲舟行
飯具貿貿然會不作路歧之慮也是晚泊葑門次日過

平望候楊碩父先生乃翁宿王崗涇次日離家已二日
矣計家中蹤跡所之必遣疾足要于路非初五早渡錢
塘事機阻矣促篙師曉夜行初四午至塘棲鬪風阻舟
身爲負絳至北新關日已銜山疾走湖上過南屏昏黑
已久叩老僧無生門僧見驚訝問故語之僧曰衲子宵
來夢白面少年朱衣乘馬入山門子今暮夜過從作萬
里尋親計吾夢不虛矣朽衲謹引領望之抵足談竟夕
翼早僧出斤金爲贈復具絮被袍履兼備微服辭行過
錢塘抵蕭山陰風淅烈趁蒿壩夜行船更餘至白鶴舉

目不辨路而盜艘從狹港來同行舟五二舟前行被劫
被劫者叫呼聲震村店居人羣起逐盜艘盜艘散是以
獲免次早過錢清關越紹興府初七晚至蒿壩溯流抵
嵎縣經畫圖山山石俱蒼綠閒吐丹砂若彝鼎色喬松
脩竹茂密古翠異鳥鳴翔其閒耳目爲之一新登陸至
新昌縣新昌距天台一百五十里山路陡絕由關山會
士諸嶺爲白頭出沒之所以布裹頭號白頭王殺掠無虛日初十
蚤自新昌行五十里前有山曰班竹途遇被劫行商數
十人赤身狂奔號哭動地同行者無不退縮離班竹里

許就荒村暫宿屋舍無人鍋箸蕩然是晚大風忽起三更時雪下盈尺文密語劉文華曰山賊飽掠歸巢當此大雪明日必不復出我輩急須過此無庸再計文華曰善遂冒雪夜行兩足東裂路無煙火八十里至大經巡司叩酒壚借火熏衣寒稍卻薄暮至天台明日曠覽赤城勝概非復人世境又明日一百二十里至台州府隨渡海八十里至黃巖縣仍登陸經盤山姚畧金竹諸嶺嶮峻插天俯臨絕壑或垂瞰海磯盤折五日至樂清縣水道五十里至管頭驛二十日乘潮抵江心寺入溫州

城覓寓得客店蔣姓家負行橐入門見一人對日獨坐
識之則趙秋屋也駭愕不知所云細訊之方知其受吾
父母託赴武林急追晤無生得曉行狀遂取道金華處
州先兩日至甌城者也秋屋裏出吾父母手諭絕無責
責語但恐孱軀弱齡長途嶮巇不能遂代父尋親之志
反爲倚門憂耳且囑秋屋云可畱則與俱歸春和再理
征帆否則水火患難藉君之靈早達桂林瞿門之福也
文心益慰次日謁兵憲孝感嚴君正矩語良久戒勉倍
至居五日秋屋文華日至西關外牙僧家訪海艘音耗

二十七日遇徽商周明宇者其人老成練達期新春初
十後發貨出沙埕埠同行甚便約既定文與秋屋文華
安宿旅次而是秋浙東水災米石價陸金自臘月二十
至正月初旬資釜半匱于珠桂矣泰順不守禁各商毋
得出洋三人衷手相對歎歎當秋屋行時母氏付路資
五十金命一蠢僕隨行僕先歸私語人曰舍人囊空必
遄歸遂取其資大半去以故秋屋囊亦罄若饑餓此土
困將奚告不得已商酌仍返武林取道金衢繇江右入
粵爲愈擇初十日離甌城早起炊飢熟值淫雨如注亭

午稍霽三人扱帶瀕行而周明宇亟來叩門啟詢之曰
十三日衆客俱繇瑞安平陽金鄉蒲門陸路出沙埕特
相約同行聞之喜欲狂而囊竭矣文華躍而起曰子同
秋屋隨明宇行至沙埕應少擔延相還家料理資釜往
返四十日刻期良晤無誤子大事兼可慰子高堂之望
語畢肩被卽行十三日至十九日雨不止二十日同明
宇發温州廿一日宿瑞安縣廿三日至平陽縣山寇又
盛前路畱信宿廿八日始至金鄉衛次日從大魚山小
魚山渡七溪海套衝激于危崖之下波濤最險幸是日

晴和蚤達蒲門所所城小而堅止汎兵五百譏商旅貨
稅籍貫聽出關登山行二十五里卽沙埕隸福寧州福
安縣有魯藩水師屯泊而不設備心竊笑之至關則見
巨艦以千計水師居半俱鄭芝龍叔鴻逵弟芝豹輩部
領通商者也憇客店程榮九家爲覓舟開洋達閩之計
二月初十日有澄濟伯旗幟天離晉船四號泊岸登樓
見之心竊喜先是父命文改名澄茲海舟有澄濟之號
澄其濟乎翼日謁其將領水營左協參將吳雄雄字鳳
苞鐵面劒眉爽氣磊落有古豪客風一見如平生相得